

Kebangkitan Isa al-Masih

Petikan dari Kitab Injil: [Yahya 20:1-18](#).

¹Pada awal pagi hari pertama minggu itu, ketika masih gelap lagi, Maryam Magdalena pergi ke makam itu. Dia mendapati batu penutup telah digulingkan dari lubang makam itu. ²Dia pun berlari mencari Simon Petrus dan pengikut lain yang dikasihi oleh Isa lalu berkata, 'Jenazah Junjungan telah diambil dari makam, entah ke mana dialihkan.'

³Petrus dan pengikut lain itu pun pergi ke makam. ⁴Kedua-duanya berlari, tetapi pengikut lain itu berlari mendahului Petrus dan tiba di makam itu lebih dahulu. ⁵Dia menjenguk ke dalam dan melihat kain linen di situ tetapi tidak masuk ke makam itu. ⁶Apabila Simon Petrus yang menyusul pengikut lain itu tiba, dia terus masuk ke dalam makam itu dan nampak kain linen terletak di situ. ⁷Dia juga melihat kain yang diikatkan pada kepala Isa, terlipat berasingan. ⁸Kemudian, pengikut lain yang sampai dahulu itu pun masuk. Dia melihat segala-galanya lalu percaya. ⁹Setakat itu mereka belum memahami apa yang tersurat di dalam Kitab Suci, iaitu Dia harus bangkit daripada kematian.

¹⁰Selepas itu, pengikut-pengikut Isa itu pun pulang ke rumah mereka.

Isa menampakkan diri kepada Maryam

¹¹Tetapi Maryam berdiri di hadapan makam itu sambil menangis. Kemudian sambil menangis dia menjenguk ke dalam. ¹²Dia melihat dua malaikat berpakaian putih duduk di tempat jenazah Isa dibaringkan dahulu, satu malaikat di sebelah kepala dan satu di sebelah kaki.

¹³Malaikat-malaikat itu bertanya kepada Maryam, 'Puan, mengapa menangis?'

Maryam menyahut, 'Jenazah Junjunganku telah diambil, entah ke mana dialihkan!' ¹⁴Kemudian Maryam menoleh lalu melihat Isa berdiri di situ, tetapi Maryam tidak mengenal-Nya.

¹⁵Isa berkata kepada Maryam, 'Puan, mengapa menangis? Siapakah yang kamu cari?'

Pada sangkaan Maryam, Dia tukang kebun di taman itu. Dengan demikian Maryam berkata, 'Tuan, jika kamu telah mengalihkan jenazah Isa, beritahulah aku di mana kamu letakkan-Nya, supaya dapat kuambil jenazah-Nya.'

¹⁶Isa berkata kepadanya, 'Maryam!'

Maryam berpaling kepada Isa lalu berseru dalam bahasa Ibrani, 'Rabboni!' (ertinya 'Guru').

¹⁷Isa berkata kepadanya, 'Jangan berpaut pada-Ku, kerana Aku belum lagi kembali kepada Bapa. Pergilah kepada pengikut-pengikut-Ku, katakan kepada mereka bahawa sekarang Aku akan kembali kepada Bapa-Ku dan Bapamu, Allah Tuhan-Ku dan Allah Tuhanmu.'

¹⁸Maryam pun pergi mendapatkan para pengikut Isa lalu memberitahu bahawa Dia telah melihat Junjungan dan Dia telah menuturkan kata-kata itu kepadanya.